

Ikastoletako Mahaia biltzeko deia egin dute LAB eta ELA sindukatuak

Sindikatuak mobilizazioei ekingo diete datorren astetik aurrera

Ikastoletako Hitzarmen Kolektiborako Negoziazio Mahaia hilaren 11an biltzeko deia egin diete LAB eta ELA sindikatuak Ikastoletako Elkarteei. Konfederakundeak bere jarrera «hertsia» aldatzen ez badu, sindikatuak mobilizazioei ekingo diete datorrean asteen.

BILBO

ELA eta LAB sindikatuak azken asteetan «ikastolen sektoreak bizi duen egoera gatazkatsua» dela eta Ikastolen Konfederakundeak izan duen jarrera «itxia eta jasangaizta» salatu zuten atzo. «Jarrera itxi honek mobilizazioak eragin ditu. Azken hilabeteetan, besteak beste, bi greba izan dira, ekainean eta urrian», adierazi zuten sindikatuak iturriek.

Ikastoletako egoera «gatazkatsuari» irtenbide bat eman eta komenioaren negoziaketaren «blokeoa» gainditzeko asmoz, ELA eta LAB sindikatuak, hilaren hamaikan Komenioaren Negoziazio Mahaia biltzeko deia egin zieten Euskal Autonomi Elkarteko Ikastoletako Elkarteei.



Ikastoletan greba izan daiteke berriz ere.

Bi sindikatuaren arabera, «datorren asteleheneko bileraren helburua, Komenioa berehala desblokeatzea da, lan orduetako sindikatuak zein Konfederakundeak egin dituzten proposamenak alde batera utziz».

Datorren astelehenean, hilak 11rako, bi sindikatuak deitutako bileraren gai ordena honakoa izango litzateke: soldatak, jubilazioak, irakasleen erreziklaia eta egonkortasuna, eta irakaskuntzan aritzen ez diren langileen lan orduak.

Ikastolen Konfederakundeak «bere jarrera hertsia» aldatzen ez badu, LAB eta ELA sindikatuak mobilizazioei ekingo dietela jakinerazi zuten. Horrela, sindikatuak landu duten mobilizazio egutegiaren arabera, hilaren 13an mobilizazioei ekingo diete.

Ildo beretik, hilaren 13, 14, 18 eta 22an ordu bateko geldialdia egingo dute eta 20an bi ordukoa. Azaroaren 26an eta 28an greba egiteko asmoa ere daukate.

HBren ustez «arriskua handitu» du Garoñako zentralako aberiak

L.K.G. / GASTEIZ

Egunotan ezagututako Garoñako zentral nuklearreko aberiak areagotu egin du «arrisku erreala» Herri Batasunaren ustez, atzo plazaratu zuen agiri batean esan zuenez.

Istripuaren berri asteartean eman zuen Segurtasun Nuklearreko Kontseiluak (CSN), apirilaren 18an gertatu bazen ere. Aberiaren zioa zera zen, isolamendurako bi balbulak ez zirela behar bezain azkar ixten, hiru hilabetez behin egiten dituzten frogetan agerian geratu zena. Hala ere, CSNek ez zuen akatsa larritzat jo

eta «anomalia» hutsa besterik ez zela izan deklaratu zuen.

HBren usteetan, aldiz, «ohizkoa» da CSNkoen ustez «anomalia» baino ez dena. Nuclenor enpresa kritikatu zuen gainera HBk «informazio faltagatik», alderdiaren iritziz «harriagarria delako, Garoñako zentralak dituen hogeitaz hamar izandako amaigabeko aberiak gogoan hartuz gero».

Bestalde, «axolagabekeriak» salatu zituen HBk, «zentralaren funtzionamendua 1991 urtetik bidezkoa dela Nuclenor enpresak aipatzen duenean».

Iruñetik alde egindako presoak lagun bat bahitu du Gasteizen

IRUÑEA

Iruñeko gartzelatik azaroaren 13an alde egin zuen Santiago Garijo Migeliz gazteak pertsona bat bahitu zuen herenegun arratsaldean Gasteizen, udaltzain bati arma lapurtzen saiatu ondoren. Garijo hamaika urteko gartzela zigorra betetzen ari zen agure bat hiltzeagatik, eta gartzelako baimena profitatuz alde egin zuen.

Santiago Garijo, epaileen erabakien arabera, agure bat hil zuen 1988ko otsailean Txantrean, bere etxera lapurtzeko asmoz sartu zenean. Hamalau labainkada eman ondoren, buroa txikitu zuen mailukadaz.

Azararen 13an Iruñeko gartzelatik atera zen, barruko baimena zuela eta,

eta orduz geroztik ez da itzuli. Astelehen arratsaldean, ordea, Gasteizen agertu zen, eta bertan istilua izan zuen udaltzain batekin, arma lapurtzen saiatu zenean. Udaltzainarekin iskanbila izan ondoren, alde egin zuen, eta orduan geldiarazi zuen ibilgailu bat, labaina baten laguntzaz.

Kotxeak autopistako bidea hartzea behartu zuen Garijok, baina peajera heltzerakoan, eta aulkia zein atea txarki zebiltzala argudiatuz, txartela ordaintzera gonbidatu zuen bahitutakoak Garijo. Hau jaitsita, alde egin zuen kotxeak, eta orduan beste kotxe bat geldiarazi zuen alde egindakoak. Atzo arratsaldean Poliziak ez zuen datu gehiagorik.

Arantxa Larrea erizainaren aurkako epaiketa izan zen atzo

DONOSTIA

Arantxa Larrea erizain irundarraren aurkako epaiketa egin zen atzo, baina epaia hamabost egun barru jakingo da. «Gipuzkoako ATS profesionalen Kolegioko abokatuak bere arrazoiak azaldu zituen epaian eta nere abokatuak nere aldekoak. Orain ikusi egin beharko dugu zer gertatzen den» adierazi zion EGUNKARIAri Arantxa Larreak.

Duela bi urte inguru erizainaren Kolegiari kuotak ordaintzeari utzi zion Arantxak, «Kolegioko behartu egiten zuen kuota ordaintzera baina, ni ez neogoen ados horrekin» zehaztu zion. Norberaren elkartzeko eskubidea onartzen duen legea kontutan izanik erabaki zuen kuotak ez hartzea, baita Kolegioko kide izateko asmorik

ez zuelako ere. Arantxak esan zigunez, orduan erabaki zuen Kolegioko Arantxaren aurka salaketa ezartzea. «Lehendabiziko epaiketa otsailean izan zen eta epaia nere aldekoa izan zen. Administrazio publikoan lan egiteko kolegiatua egotea ez zela beharrezkoa erabaki zuen epaiketaren zehaztu zuen Arantxak.

Epaiketa ostean epaia errekurritu zuen Kolegioko, eta horregatik egin zen bigarren epaiketa. «Epaiketa berriak zer dioten ikusi beharko dugu orain, lehendik badu Kolegioko kontrako epai bat» adierazi zion. Kolegioko kontrako epaia izanez gero, norberaren elkartzeko eskubidea defendatzeagatik epaia irabazten duen lehen pertsona litzateke Euskal Herria osoan. Arantxak derrigorrezkoa ikusten du legea aldatzea.

Ezkerraldeko trenbideak hobetzeak 20.000 milioi pezeta balioko du

LUIS KARLOS GARCIA / GASTEIZ

Nerbioiko Ezkerraldeko trenbidea desbideratzeko proiektuak 20.000 milioi pezeta balioko du (1.000 milioi libera), Josu Bergara Garraio sailburua, Jose Alberto Pradera Bizkaiko diputatu nagusia, Josu Ortuondo Bilboko alkatea eta Merce Sala Renfeko lehendakariak atzo Gasteizen sinaturiko komenioaren arabera.

Datorren urtean lanak has daitezkeen proiektu horrek Olabeagatik desbideratuko du trenbidea, San Mamesetik Abandoko geltokira sartzeko. Gainera, Campa de los Ingleses

seko kontenedore geltokia kenduko dute, Barakaldora eramango dutena.

Renfe, Bilboko Udala, Bizkaiko Foru Aldundia eta Eusko Jaurlaritzako Garraio eta Herrilan sailak erdibana finantzatzeko dute egitasmoa, zeinek «Bilboko garapenerako esparru garrantzitsuak berreskuratzea erakarriko duen» Merce Sala Renfeko lehendakariaren iritziz.

Proiektu honen bidez «etorkizuneko Bilbo» jorratzen ari dela adierazi zuen Josu Ortuondok, eta aurretik, distantzia hurbiletako tren «metroaren osagarri» bihurtzeko bidean dagoela adierazi zuen Salak.



Trenbideentzako dirulaguntzen akordioa atzo sinatu zuten.

OIALDE



BILBOKO UDALA
AYUNTAMIENTO DE BILBAO

HIRI-GASERAKO ALTEN ETENALDIA

Bilboko gas bideratuaren zerbitzuaren berriztapena laster egiteko asmoa dagoenez, eta oraingo horniduraren akatsak konpontzeko asmoz (batez ere negualdian), Udalak Gas Udala Lantegiak oraingoz alta berriak kontrata ez ditzan erabaki du.

Haua, abonatu litezkeen berriek zein baimenduriko gas-instalazioak kontratazioaren ukapenaren au-

rretik ekintzak hasi edo obrak egin ditzaten baino lehen, jakinerazten da.

Udalak, epe labur baten buruan, hiri-gaserako altei berriz ere ekitea espero du.

Bilbao, 1991ko azaroaren 6an.

ZERBITZU TEKNIKOEN
SAILEKO ORDEZKARIA

